

摘藻堂四庫全書薈要

史部

欽定四庫全書叢要

史部

硃批諭旨卷一百四十八

詳校官編修臣繆晉



欽定四庫全書薈要卷八千八十六

史部

硃批諭旨卷一百四十五

硃批唐執玉奏摺

雍正七年七月十五日署理直隸總督左都御史

臣唐執玉謹

奏為遵

旨查奏事本年六月十三日大學士臣蔣廷錫傳

旨將巡農御史舒喜請建清河倉房一摺交臣查奏臣

到任之後即細加訪察查舒喜至清河地方其時知縣王瀧業已告休委署試用知縣郭二成不過暫行署理似無賄囑之人再查直隸州縣現奉

恩旨蓋造倉廩臣以各州縣估價浮多現在嚴行核減并欲另委賢員責令估計不敢聽其冒銷亦無賄囑之項再臣細查歷任知縣告休叅處多由倉穀不清則舒喜所

奏似非虛妄相應據實奏

聞謹

奏

據奏如此則凡似清河縣者俱當作速修整料理不容延緩

雍正七年八月初九日署理直隸總督左都御史
臣唐執玉謹

奏爲恭報秋禾收成分數事竊照直隸秋成分數據
各道府由布政司轉報到臣查霸昌道屬收成有

十分九分及七八分不等永平府屬收成有九分
八分七分不等保定府屬收成有十分九分八分
不等河間府屬收成有十分九分不等天津州屬
收成有八分七分不等正定府及五州屬收成有
十分九分八分不等順德府屬收成有十分九分
及七八分不等廣平府屬收成有十分九分八分
不等大名府屬收成有十分九分八分不等宣化
府屬收成有十分九分及七八分不等今歲秋成

洵稱大有

臣

目覩豐亨不勝欣忭惟霸昌屬之武

清一邑夏間大雨時行河流暴漲堤岸衝激致被
水災荷蒙

皇上軫念民生發帑賑濟

天恩浩蕩士庶歡騰又據隆平縣詳報農民岳迪吉等
呈送藉田內所產瑞禾一莖雙穗碩大堅好共有

三十三本

臣

欽遵

諭旨停其

進獻飭令敬貯

先農壇宇以誌休徵合并奏

聞謹

奏

覽秋收分數深慰朕懷

同日又

奏為奏

聞事竊據保定府清苑縣詳稱本年閏七月二十九日

夜四更時候監內賊犯乘禁卒睡熟有孫京趙大力趙虎兒魏七兒柳老包五名扭打鎖鑰挖通監牆越獄脫逃等情臣即嚴飭在城各營弁兵協同地方官嚴加查緝當將魏七兒等四名拏獲收禁外尚有柳老包一名未獲臣復飭令在城官役密行查拏續據清苑縣詳稱於八月初二日又將柳老包拏獲以上越獄賊犯五名俱已全獲等因到臣查定例越獄逃犯當時即行拏獲者免叅疎防

咨部備案等語今清苑縣越獄賊犯五名俱已全
獲除檄令按察司查明刑書禁卒人等有無賄縱
情弊另案歸結并照例咨部備案外事關省城賊
犯越獄臣不敢以已經全獲匿不奏

聞為此謹

奏

知道了越獄賊犯當加倍處分以示儆戒何竝未議及
耶

雍正七年八月二十九日署理直隸總督左都御

史臣唐執玉謹

奏為覆奏事竊本年閏七月二十九日清苑縣賊犯
孫京等越獄脫逃一案經臣將脫逃復獲緣由繕
摺具

奏奉有

硃批臣捧讀之下不勝惶悚伏查賊犯越獄臣已咨明

刑部使將來加倍治罪有案可稽乃

奏摺內未及聲明甚屬疎漏臣粗率之罪實無所辭
伏乞

聖恩寬宥為此謹

奏

似此疎漏向後不可

奏為奏

聞事前任張家口城守營叅將守備等官將下堡城
壕令民自行填平蓋造房屋又將操兵教場週

園空地令民耕種伊等取租入己費用相沿以
來歷經數任於雍正三年緣原任萬全縣知縣
王德懋與原任叅將韓勛不睦即將此項房屋
地畝租價緣由查明通詳伊該上司從此叅將
守備將此項房地租銀並未收取迄今五載地
方官員竟無定著因無收租經營之人小民誠
恐現今無人收租日後至有累及家產之虞一
年所得租銀計二三百餘兩現今五年未行收

取共有一千餘兩懸擱無著臣思此項房基地
畝俱係官地則此項租銀相應交與地方官員
查明入官及今不行查收以至年久積多一時
收取而民不能交納反滋苦累若將此項租銀
交與直督查明定議不惟小民不至年久積多
一時不能交納而錢糧亦不至兩懸致有虧欠
矣為此謹

奏

地方上類斯等件雖屬末節亦皆應次第料理者朕若不勤察好問何由得聞封疆大吏固可以遵豆之事卸責有司而該州縣亦竟置之膜外汝等寧不當過而問耶再者王德懋通詳案內韓勳有無冤抑處亦當察明摺奏以聞

雍正七年九月二十六日署理直隸總督左都御史臣唐執玉謹

奏為覆奏事竊臣查張家口城守營叅將守備將下

堡城壕令民填蓋房屋又將教場空地令民耕種
取租一案雍正三年正月十八日原任宣化鎮臣
許國桂據張家口鄉約王榮瑞等具呈內稱本堡
有官地民房韓叅將等私取房錢舖民受累等因
移咨原任總督李維鈞又據原任叅將韓勛呈稱
本營把總署東空地又堡外城壕及教場空地租
與民人蓋房每年把總收銀五兩六錢守備收銀
八十三兩叅將收銀不及六十兩等因隨經李維

鈞飭查去後嗣據原任萬全縣知縣李三光造送

清冊各數俱與營報之數相符歷任督臣往返批

查亦未即行定議延至本年三月十五日始據萬

全縣現任知縣修鑑確查此項租銀每年叅將實

收銀九十六兩零守備實收銀一百三兩零把總

實收銀五兩六錢通共二百五兩七錢各地戶租

種教場地畝歷年收租穀七十二石零租銀二十

八兩零內除在萬全縣納本色糧三十三石零又

籽粒銀三兩八錢零係入秦銷之項其武職衙門
所收房租地稅除納糧外每歲約可餘銀二百七
十餘兩或自雍正五六年起著地戶照額輸租歸
入正項等因具覆而張家口叅將沈力學又請將
此項房地租稅照舊催收以資公用具詳前署督
臣楊鯤隨行口北道宣化府妥議去後至今未據
查覆臣現在嚴催俟覆到核實具奏外謹先奏
聞至於韓勛從前犯案重疊俱蒙

皇恩寬免發往安西當兵效力今查此事亦無寬抑相應一併

奏明所有奉到

硃批奏摺一扣合先恭繳謹

奏

覽奏已悉

昨張璣到京備奏卿不惜心力辦事精神甚覺勉強暫時尚可支持若為日長久病軀恐不能堪等語朕聞之

深為軫念卿自履任以來辦理諸務公勤不懈一切奏對咸出於誠敬兼且明悉無遺朕甚嘉之當節省無益之勞於瑣細案件何必過費精神百凡惟總持大綱其餘委之兩司各屬員以責其成無庸一一躬親料理也朕因一時不能得人故委卿於此劇任大約明春二三月間史貽直可到意欲命來代卿今特遣冀棟至保診視調治商酌藥餌其加意攝養痊愈以慰廑念卿暨兩司皆到任未久新歲朝賀不必來京特諭

雍正七年十月十五日署理直隸總督左都御史

臣唐執玉謹

奏為奏

聞事本年十月初六日臣齋摺千總捧到

硃批諭旨初九日宗人府府丞臣冀棟奉

旨到保宣傳

上諭并

欽賜人參二觔臣望

闕叩頭祇領訖伏念

皇上高厚之恩逾於父母銘心鏤骨感激之切難以名

言臣今仰體

聖懷現在調養俟冀棟回京之日另行繕摺恭謝

天恩外合先奏

聞謹

奏

覽卿奏謝知道了遵旨加意調攝可也

同日又

奏為恭報瑞雪及時事竊直屬地方雨暘時若禾稼豐收今二麥在地正賴冬雪及時來春土膏滋息得以茂實茲保定郡城於十月十一日自亥時起至十二日寅時止天降瑞雪隨落隨消據清苑縣查報入地一二寸不等其各屬得雪分寸俟報到另行彙

奏外所有保定郡城現得瑞雪緣由臣謹具摺先行

奏

聞謹

奏

都中得雪盈尺乃保郡雪消入地止一二寸何咫尺之間如是迥異耶實出朕之意外

雍正七年十一月初四日署理直隸總督左都御史臣唐執玉謹

奏為請

青事竊照直屬各營馬步兵丁春季糧餉若俟各屬徵解到日支放必得二三月間兵丁難以久待是以歷來督臣奏懇

皇仁借動司庫存貯銀兩於上年冬底預行支給俟部撥之後徵解到日即行清扣還項由來已久今據布政使王謩呈請將直屬各提鎮協營廳并各駐防應需雍正庚戌年春季餉銀二十五萬六千九百四十兩零循例在於司庫現存雍正七年地糧

銀內照數先行撥解各司餉之道府州衙門按名散給以資兵食等因前來理合具摺奏請

皇上天恩循照往例將庫貯銀兩預行借給俟部撥徵解到日扣還歸款於兵丁實為有濟臣未敢擅便伏乞

皇上睿鑒施行謹

奏

此項兵餉自應循照舊例預行借給所奏知道了

雍正七年十一月初九日署理直隸總督左都御

史臣唐執玉謹

奏為再陳下悃恭謝

天恩事本年十月初十日宗人府府丞冀棟來至保陽

宣傳

諭旨命臣凡事總理大綱愛養精力并

賜人參二觔

天語周詳

聖恩稠疊臣恭膺

曠典感激涕零隨經冀棟診脈立方專用溫補之劑迄
今一月精神較勝從前步履亦覺輕便自此有生
之年皆出

皇上恩賜倘臣不即填溝壑誓當勉竭駑駘以繼臣未
盡之志而已為此謹

奏

覽卿奏謝知道了仰遵前旨愛養精神加意調攝量力

辦事嗣後有仍須冀棟斟酌方藥處即行奏聞保郡密
邇可再命伊前往也

雍正七年十二月初八日署理直隸總督左都御
史臣唐執玉謹

奏為懇

賜陞見以達愚忱事本年十月初六日奉

硃旨臣暨兩司皆到任未久新歲朝賀不必來京欽此
臣理應恪遵但臣賦性迂愚到任半載一切事務

雖未能詳悉周知而於地方情形目覩耳聞亦已
畧見一二其中備細有摺奏所不能盡筆墨所不
能宣者茲當封印之後案牘清閒容臣扶掖入都
備陳一切庶得親承

指示有所遵循或於地方稍有裨益再查按察司姜穎
新請

訓未久無庸復請

陞見至布政司王暮到任將及一載併乞

俞允隨臣進

見以遂其嚮往之誠臣不勝激切待

命之至為此繕摺請

旨謹

奏

既有面奏之事歲內且不必來新正十二日朕恭行

祈穀大典之後約於十二日至圓明園駐蹕卿於初十日自保起程十三日可抵御園候旨進見王暮不必俱

來

都察院左都御史臣三泰謹

奏為據稟奏

聞事竊臣族弟明亮蒙

皇上天恩於雍正六年四月內

特放熱河理事同知又於本年十一月內奉

旨調任永平府理事同知今據明亮將熱河稅務一

事具稟前來看其字內為

國課起見合將原稟一並恭呈

御覽謹

奏

此事可密查確實詳議奏聞前據楊鯤奏請將陳肇奎
調補熱河同知朕心疑之著將陳肇奎在彼居官優劣
如何之處亦一併察明具奏以聞

同日又

奏為遵

旨查議事竊臣奉

皇上發到左都御史三泰奏摺一扣並永平府同知明亮原稟一件奉有

硃批諭旨臣查明亮所稱熱河稅銀若果儘收儘解實可收銀五六千兩等語又稱若將榜什營三岔口等處一并徵收則商販貨物無從走漏竟可與張家口所收二萬兩之數不相上下等語臣隨遣人出口備細稽查此項稅銀原無一定之額如遇豐

稔之年口外糧食絡繹進口則同知陳肇奎所報
四千五百兩之外實有盈餘若遇歉收之年則貨
物希少正額尚恐不足故止以四千五百兩為折
中定額是明亮所稱儘收儘解實可收銀五六千
兩之語止據豐收之歲而言雖未可定為章程其
言亦非盡屬虛妄至所稱榜什營即巴克什營也
離古北口外七里為熱河喀喇河屯之總路又東
北十八里為三岔口為鞍匠屯紅旗營十八里汰

一百家蒙古驛站之總路係行人往來出入之區
非商賈貿易之地並無貨物可以抽收且巴克什
營離熱河一百八十餘里熱河既已收其落地稅
而巴克什營又抽其過路鈔銀則一百八十里之
內抽稅兩重恐商賈裹足不前或致正稅缺額是
明亮所稱榜什營三岔口一並徵收可與張家口
二萬兩之數不相上下之語殊難憑信至明亮所
稱牙行陳金王者原係先在熱河私侵客稅之陳

國瑞改名陳金玉克認牙行舞弊作姦為同知陳肇奎斥革遂與先經革退之牙行許登科等赴部具呈每歲願認額徵銀三千三百兩今陳肇奎所報已至四千五百兩與陳金玉所認之數多寡已屬懸殊又明亮所報伊任內半年盈餘共報出銀九百五十餘兩通年計算亦止一千九百餘兩今陳肇奎所報較之明亮所報又屬浮多揆此情形恐係陳金玉等被逐不甘希圖報復故為張大之

詞以遂其姦狡之計即明亮亦墮其術中而不知也但熱河地方旗民雜處陳肇奎身係閩人於蒙古語清字文茫然不解人地實不相宜再查陳肇奎現在居官雖無貪劣確據但其居心頗欠誠實臣久已疑之據臣愚見熱河稅務似應仍照四千五百兩之數徵收將陳肇奎調歸內地就近試用遴選滿洲誠實人員責令儘收儘解俟一二年內權其所收之多寡以為定額倘日後所收溢於四

千五百兩之外即在陳肇奎名下照數追賠庶人地相宜於

國課亦有裨益矣為此謹

奏

於此一事陳肇奎明亮等二人朕皆不能無疑另委滿員試驗甚為得當候朕斟酌一優者再降諭旨

雍正八年正月二十五日署理直隸總督左都御

史臣唐執玉謹

奏為奏

聞事竊臣查永平府屬遷安縣知縣王孔彰詳報教諭
賀耀祖與訓導張世寧之子並伊親陳姓顧姓肆
行賭博又據教諭賀耀祖等訐報知縣王孔彰受
賄縱令劉思毅私開燒鍋並短發工食違例受呈
與坐轎經過

文廟等款據永平府及布按二司詳揭到臣經臣題
叅奉

旨這所叅賀耀祖著革職張世寧著解任其互訐各款

情由及本內有名犯證該督一併質審定擬具奏王
孔彰不必革職亦不必解任如有質對之處令其質
對該部知道欽此欽遵飭審去後今審明賀耀祖賭
博是實按律擬罪其王孔彰違例受呈坐轎經過

文廟二款審無其事但王孔彰縱開燒鍋受賄銀二
百餘兩已自行承認至短發工食祭祀等銀約四
十餘兩亦各役供詞有據臣查遷安縣知縣王孔

彰於燒鍋案內受賄又扣剋工食等銀婪贓不法
既經審有實據似應將王孔彰題叅革職究擬理
合先行具摺奏

聞謹

奏

王孔彰革職究擬理所當然何待言耶前旨不令解任
者或恐教官有挾怨詆誣情弊耳今既審有實據朕亦
何所顧惜而欲縱此貪吏殊屬多此一奏向後但須秉

公執法而為之類此等事朕便諭令姑容猶當力爭豈特不必預為奏請朕以汝為深知朕意之人今即此觀之則汝竟未能領悉朕意也

同日又

奏為續報得雪事竊查上年十月十一月所得瑞雪
地方經臣具摺奏

聞今復據各屬續報前來除得雪一二寸者不敢繁敘
外查昌平州及順義懷柔二縣於上年十二月二

十六七八等日各得雪四寸延慶衛得雪八寸通
州得雪一尺餘寸再大城東安二縣於雍正八年
正月十六日各得雪六寸霸州於正月十六至十
七日得雪一尺餘寸文安永清二縣並延慶衛各
得雪四寸固安縣得雪八寸清苑縣得雪一尺餘
寸安州得雪五寸安肅縣雄縣得雪六寸唐縣得
雪三寸祁州得雪四寸蠡縣得雪八寸深澤縣得
雪九寸滿城定興完縣慶都四縣各得雪六寸易

州高陽博野三州縣各得雪五寸新城新安容城
三縣各得雪八寸河間故城二縣各得雪五寸正
定元氏二縣各得雪七寸井陘獲鹿二縣各得雪
一尺欒城行唐平山三縣各得雪四寸贊皇武邑
衡水三縣各得雪五寸南宮縣得雪三寸棗強新
河隆平栢鄉高邑臨城寧晉七縣各得雪五寸武
強縣得雪八寸饒陽安平無極三縣各得雪五寸
藁城縣得雪六寸曲陽新樂二縣各得雪五寸鉅

鹿縣得雪四寸唐山縣得雪三寸延慶州得雪三寸所有各屬續報得雪緣由臣謹具摺恭

奏以慰

聖懷謹

奏

畿輔州縣得雪優渥朕以手加額覽焉

雍正八年三月十七日署理直隸總督左都御史

臣唐執玉謹

奏為請

旨事竊查密雲城外白河夏秋之交山水暴漲直逼城
西是以沿河一帶舊築石子大堤以護城身復築
土堤沙堤木壩以護石堤惟是河流迅急土木堤
壩不能捍禦近年以來衝刷殆盡所存僅有石堤
一道倘石堤再或被衝合邑人民難免水患先據
密雲縣知縣吳璟詳請興修復據調任霸昌道張
慶曾以築壩塞流未能一勞永逸議請於河身之

西自李家莊至師家莊另開新河一道由北口直趨南口水勢得洩可無泛溢之虞其言似屬近理經臣於本年正月十四日面奏欽奉

諭旨以築壩挑河不可偏廢令臣委員查勘詳悉奏

聞臣隨委現任霸昌道李如梓等詳勘去後據稱李家莊至師家莊八百餘丈地勢高出河身三丈有餘若開挖新河大費人力更須多築堤壩堵塞舊河東口方可引順流之水歸入新河否則仍然旁溢

而應築堤壩之處又直當正衝堤壩難於築立徒
糜重費無濟於事即舊設之沙堤土堤木壩俱橫
攔急湍山水奔騰直下與壩相激縱使多費物力
旋築旋衝究無裨益詳察河形上有土嘴以逆水
性下有堤壩以遏水勢是以泛溢瀰漫驟難洩瀉
議請挑去土嘴寬讓河身使水暢流直趨南下併
請貼近河身另築堅厚土堤一道以幫石堤堤根
用榆圀載石以固其基務使石堤完好則城垣鞏

固舊日被衝之堤壩俱無庸更議修築以省糜費
據估挑挖堤嘴築立幫堤共需工料銀四千四百
四十兩零臣隨將先後各議再四審度李如梓等
所議順水之性事易成功合之疏濬之法似屬允
宜謹將送到圖形恭呈

御覽如或可行應請於司庫所貯雍正三年耗羨銀內
動用給發擇日興工為此繕摺請

旨謹

奏

覽所議甚屬妥協作速興工務令於夏月發水以前告竣照例咨明該部存案可也

同日又

奏為請

旨事竊查密雲城工自康熙五十五年興修之後迄今十有五年城垣漸次坍塌歷據該縣正署各員詳請修築前任督臣駁查核減未經奏

聞臣署事後復據布政司申報請修臣隨飭委道府等

員查勘確估去後茲據造冊詳報前來臣親加核

減通計坍塌城牆陂岸海漫土牛夾道等項共一

千四百二十六丈零共需人工物料銀九千九百

六十六兩零據稱實係必需委無浮冒應請於雍

正三年耗羨項內照數動撥給發修理臣再令加

意節省如有餘剩解還歸款除工料細數統候

奏報完工另行核實造冊送部外所有動帑修理城

工緣由理合具奏請

旨再查雍正七年八月二十四日奉

旨嗣後修理城工俱交與該督撫布按每人各管一處
若止一二處者則令挨管欽此欽遵今密雲城工應
臣保固合併奏

聞謹

奏

一應物料等項并興工日期應咨明該部者咨部存案

雍正八年三月二十六日署理直隸總督左都御史臣唐執玉謹

奏為恭報得雨事竊臣查今歲春間積雪之餘繼以雨澤麥苗茁長欣欣向榮二月二十五三月初五初八等日各州縣所報得雨分寸自一二分至五六分不等臣擬俟各屬到齊彙行

奏報乃自本月初八日大名府屬得雨之後經今半月各州縣並無報到又兼二十一二等日大風迅

發風高土燥於田稼頗不相宜臣目擊情形不勝
憂懼隨於二十四日禁止屠沽率同文武各員設
壇祈禱二十五日陰雲布護時雨沾濡據清苑縣
報稱四鄉得雨自二分至五分不等雖未據報霑
足而土膏潤澤田禾滋長民心頗安臣現在仍率
司道各官虔誠祈禱俟各屬報到再行具
奏先此奏

聞謹

奏

昨據清查地畝官員回京奏稱在完縣地方經過兩三次透雨何摺內並未言及似此汝於地方諸事總未之知也諺云百里不同風從未有通省風雨如一之理乃不遯處留心察訪但欲保定雨暘應時而置他州縣於不問是何理耶正因汝以目前區區私心從事祈禱所以四境頗皆霑足而獨保郡僅得五分雨澤今後若不恪秉忠誠之念以感格

天地神祇徒恃禁屠設壇虛文希冀嘉澤下降則大誤矣
雍正八年四月初一日署理直隸總督左都御史
臣唐執玉謹

奏為據實陳奏懇

賜處分以懲溺職事竊臣於恭報雨澤一案自知辦理
錯謬未奉

諭旨之先臣寢食不寧已數日矣查從前各屬報雨臣
智識短淺以為尚非望雨之時怠忽因循未經

奏報及至半月無雨難以奏

聞又不將從前遺漏緣由檢舉補

奏乃復循襲具文設壇祈禱愈辦愈錯怠忽如此溺
職之罪實難自解除將三月二十五日以前未經
奏

聞及三月二十五日以後現應

奏報者分繕清摺恭呈

御覽外伏乞

肯實心効力與否宜在飭部議處耶
皇上勅部嚴加議處使臣戴罪効力知所懲戒不致怠
忽因循有玷厥職則叨沐

天恩無既矣臣不勝慚愧悚惶之至謹

奏

覽

署任總兵蔡永文居官何如詳加訪察據實具奏以聞
雍正八年四月十五日署理直隸總督左都御史
臣唐執玉謹

奏為續報雨澤事竊臣查四月初二日以前各屬報到所得雨澤經臣具摺

奏報今據各屬續報前來除得雨一二寸者不敢繁敘外大城縣四月初八日得雨三寸昌黎縣四月初四日得雨三寸唐縣四月初八日得雨四寸河間阜城東光三縣各得雨三寸寧津縣得雨四寸吳橋縣得雨五寸天津州大雨四野霑足靜海縣滄州各得雨三寸慶雲縣三月二十五日得雨三

寸鹽山縣得雨三寸平山縣四月初八日得雨三寸井陘縣得雨五寸棗強縣得雨六寸衡水縣得雨四寸武邑縣得雨三寸深州得雨三寸新樂縣得雨三寸清河縣得雨四寸威縣得雨三寸大名元城二縣三月三十日各得雨四寸四月初四日各得雨三寸清豐縣魏縣各得雨三寸東明縣得雨五寸南樂縣得雨四寸開州得雨五寸蔚縣三月二十五日得雨三寸懷安縣四月初一日得雨

三寸俱稱霑足查各屬得雨月日不同而報到亦有遲速是以叅錯不齊除俟各屬再有報到另

奏外所有現在得雨緣由臣謹具摺奏

聞謹

奏

據奏得雨分寸尚未霑足仍當竭誠虔禱可也但諸如此奏切勿聽信有司捏報以多為少致開迎合之門而貽掩耳盜鈴之誚虛偽二字朕甚不取戒之

雍正八年四月二十日署理直隸總督左都御史
臣唐執玉謹

奏為奏明耗羨銀兩事竊查直隸雍正三
四五六等
年耗羨自雍正六年開徵起至年底所有已未完
及動存各數經前署督臣楊鯤於雍正七年四月
內按年分晰開具清冊

奏明在案所有雍正七年正月起至年底收除過三
四五六等年并七年耗羨已未完動存各數復行

據布政使王謩查明造冊呈送前來臣復加確核
除將各冊另行送部存案外所有逐年耗羨已未
完動存各數理合繕具黃冊恭呈

御覽伏乞

皇上睿鑒施行謹

奏

章奏中凡遇此等事件朕止一過目而已從不更加察
核總在汝等秉公辦理不致後來人檢點為是其中設

有出入不當存私朦混處曾奏過三字亦豈能免咎況
經報部存案之事絲毫皆按款可稽也所奏知道了

雍正八年十二月十六日兵部尚書暫署直隸總
督印務臣唐執玉謹

奏為微臣戀

主情殷恭請

陞見以聆

聖訓事竊臣於本年正月十四日入覲

天顏荷蒙

聖諭周詳諄切訓誨使臣知所遵循感激之私銘諸肺腑但臣才識疎庸雖竭盡駑駘而於地方事務終愧未能妥協深恐措置失宜有負

皇上委任至意今計封印之後案牘簡少伏懇

天恩容臣率同布政使王蕃按察使姜穎新恭請

聖安親聆

指示勉力奉行使得免於隕越庶於地方有益而臣犬

馬依戀之衷亦少慰矣臣不勝激切待

命之至謹

奏

仍照依去歲諭旨於新正起程來京可也

雍正九年三月初十日兵部尚書暫署直隸總督
印務臣唐執玉謹

奏為恭報雨澤事竊照直屬上年冬底得雪深廣在
在土膏滋潤雖不十分需雨然時當季春麥苗得

雨發生更盛豐稔可必今據順天府屬之涿州申報三月初六日得雨六寸保定府屬之清苑安肅定興容城高陽新安六縣申報是日各得雨三寸涿水慶都易州三州縣各得雨四寸滿城縣得雨五寸咸稱四野均霑農民歡悅等因前來除各屬所得雨澤一二寸者甚多俱不敢繁敘并俟報到再行

奏報外所有直屬得雨緣由臣謹先行奏

聞謹

奏

春雨滋苗最為難得覽奏曷勝欣悅

雍正九年四月初十日兵部尚書暫署直隸總督

印務臣唐執玉謹

奏為據實陳奏事竊直屬河間大名等府上年偶被
水災荷蒙

皇上特遣廷臣分路賑濟發帑發粟蠲免停徵冬春之

間復准平糶倉糧出借社穀拯恤

洪恩逾於常格直屬生民早已安居樂業更無乏食之虞矣惟大名府屬之開州東明長垣三州縣上年雨水過多而長垣一邑西接蘭陽東連曹縣被災尤甚臣深切隱憂入春以來經臣絡繹稽查前後捐穀一千五百餘石捐銀七百兩飭令地方官設法賑濟以待麥收現在青苗倍茂豐稔可期雖多就賑之民而民情尚覺安堵今蒙

聖德如天有加無已復

命臣與副都統臣趙宏濟會商加賑茲已欽遵

諭旨委員分路稽查其被水尤多應行加賑者飭令核
實賑濟外至開州東明長垣三處亦已多委幹員
跟隨趙宏濟前往親查酌量加賑務使民沾實惠
延至二麥登場以仰副

皇上愛育元元之至意先此具摺奏

聞謹

奏

地方上類斯民間疾苦猶煩朕之廛念汝等寧不愧赧
耶

同日又

奏為恭報雨澤事竊照直屬各得雨澤分寸經臣具
摺奏

聞今復據各屬續報得雨前來查長垣東明二縣三月
初八日得雨三寸涿州四月初五至初六日得雨

五寸永清縣得雨三四寸不等密雲順義房山完縣滿城涑水六縣四月初五日各得雨三寸唐縣得雨五寸俱各霑足餘俟再有報到另行

奏報外所有現據申報得雨緣由臣謹繕摺奏

聞再查順天府屬之良鄉固安永平府屬之盧龍遷安撫寧豐潤保定府屬之易州清苑慶都安肅定興容城河間府屬之河間獻縣正定府屬之正定井陘贊皇獲鹿順德府屬之邢臺廣宗唐山沙河鉅

鹿內邱南和平鄉任縣廣平府屬之永年曲周邯
鄲清河威縣成安雞澤大名府屬之開州元城南
樂直隸趙州併所屬之柏鄉高邑臨城寧晉隆平
直隸深州併所屬之饒陽直隸定州併所屬之曲
陽新樂等四十八州縣據陸續申報於三月初八
初十二二十十一二十三及四月初一初五六等
日各得雨一二寸不等因未及分寸不敢逐一繁
敘合併陳明為此謹

奏

畿內前此得雨俱未霑足近日以來頗覺氣候調和或可普被

天澤也

雍正九年五月初十日兵部尚書暫署直隸總督
印務臣唐執玉布政使臣王暮謹

奏為欽奉

上諭事竊臣等欽遵

諭旨會同副都統臣趙宏濟料理加賑一案隨將上年

散賑冊檔逐一查核並委雄縣知縣謝應魁等跟

隨趙宏濟前赴長垣東明開州三處查看料理其

餘如大城景州交河吳橋沙河南河任縣永年邯

鄲雞澤衡水武邑青縣滄州東光等處亦係上年

被水稍重之區亦經遴委賢員會同各地方官確

查一體加賑去後茲據各委員及該地方官查明

現在平糴倉穀市價已平有地之家固可待至麥

收無地之人亦得營工餬口且有借給社穀資其耕作並無失業乏食之人逐一出具印結申覆無庸加賑外其開州東明長垣三州縣臣等仰體

皇仁酌量加賑二十日仍照上年大口日給穀一升四合小口日給穀八合開州共賑過窮民大小口八千二百口東明縣共賑過窮民大小口二千九百三十口長垣縣共賑過窮民大小口一千八百五十三口其長垣縣原未被水而現在粥廠領賑貧

民又賑過大小口二萬八千六十四口各州縣窮
民歡聲載道於賑務告竣之日俱執香羅拜嵩呼
萬歲叩謝

天恩所有已未加賑緣由理合奏

聞謹

奏

萬姓感戴朕恩且置勿論其如怨汝何

雍正九年五月二十二日兵部尚書暫署直隸總

督印務臣唐執玉謹

奏為恭報二麥實在收成分數事竊照直隸二麥收成
分數經臣確查去後據各道府州陸續呈報到
臣查順天府屬實有十分九分并八分七分不等
永平保定二府屬俱十分九分并八分不等河間
府屬九分天津府屬九分八分并七分不等正定
府屬十分九分并八分不等冀州屬十分九分并
八分七分不等趙州屬十分九分并八分不等深

州屬十分晉州屬九分八分不等定州屬十分并
八分七分不等順德府屬九分八分并七分六分
不等廣平府屬十分九分并八分七分六分不等
大名府屬十分九分八分并七分不等咸稱二麥
收成豐稔物阜民安等情前來臣謹恭摺奏

聞再查順德府屬之邢臺內邱二縣於五月初三四等
日有五廊霍樓等七村莊偶值冰雹經委員確勘
除內邱縣之五廊等四村莊業據查明麥已登場

損傷甚少例不成災其邢臺縣之霍樓等三村莊
俟勘明實在情形另報外合併陳明謹

奏

聞昌平一帶地方近日望雨甚殷且通省雨澤均屬未
足當竭誠自返省察吏治可也

同日又

奏為據實陳奏事竊臣前因天津新設府治規模初
定事務紛繁宣化府知府馬益新承

訓旨似欲勉圖報效而北路軍需俱係口北道王崇張
家口同知白石辦理知府一官或可通融調補故
臣冒昧

奏請而宣化一缺緊要甚於天津未曾計及臣之愚
昧咎實難辭今詳加揀選廣平府知府李梅賓刻
苦自勵不辭勞瘁不尚虛名

計典中經臣附薦荷蒙

俞允准其卓異在案如以陞銜調補天津知府人地似

屬相宜再天津縣一缺亦係緊要前以試用人員

萬申祺擬補近見該員設心狡詐即長垣煮賑一

事不惟不行捐助且於公捐項下尚有侵漁臣現

在飭查未便復行擬補清河縣知縣徐而發屢經

委署於地方事務俱能盡心料理以之調補天津

縣缺自能勝任再蘆溝橋西路同知一缺臣以雄

縣知縣謝應魁擬補河間府河捕同知一缺臣以

定州知州王大年擬補前准部咨俱以不合例駁

飭令臣另行揀選臣查通屬一百四十州縣合例者止一二人其餘簡僻小縣僅能供職俱非可調之員臣實出於萬不得已敢祈

皇上俯念用人之難破格錄用或另行

敕部揀選補授臣因地方起見斷不敢稍有私心固執已見貽誤將來伏望

聖明垂察為此謹

奏

類斯違例保題只宜偶一行之豈可為常除此不合例者再無可調之人是何言歟所擬數員果皆超卓之才乎恐亦未必然若實有萬不得已處據情再行題請併將人員送部引見候朕酌定

雍正九年六月二十二日兵部尚書暫署直隸總督印務臣唐執玉謹

奏為續報雨澤事竊查直屬州縣得雨分寸經臣前已具摺報

聞今復據各屬續報得雨前來除得雨寸餘及二寸之處俱未及分寸不敢逐一繁敘外查順天府屬之涿州六月十九日得雨二三寸不等昌平州薊州六月十五日各得雨三寸梁城所六月十二日得雨三寸永平府屬之玉田縣六月十五日得雨三寸保定府屬之祁州六月二十日得雨三寸俱各霑足所有各屬申報得雨緣由合行

奏報再查良鄉等州縣間亦得有時雨臣現在飭查

俟查有分寸另行摺報合併奏

聞謹

奏

據奏雨澤分寸果係我君臣能感

天和之所致耶朕已代汝深為慶幸但未知汝曾思及朕亦似汝之厚顏否

硃批諭旨卷一百四十五

欽定四庫全書薈要卷八千八十七

史部

硃批諭旨卷一百四十六

硃批繆沅奏摺

內閣學士

臣繆沅謹

奏

臣於雍正六年四月二十日奉

旨差審叅草原任蒲臺縣知縣朱成元家人張士榮叩

閣控告告休蒲臺縣知縣王僧慧一案

臣於五月初

二日至濟南本日行文巡撫咨提原狀內官犯人

等竝提原卷十五日准巡撫將人犯文卷解到

臣

即隔別研訊據成元供稱原有那移銀六千餘兩
尚有民欠七千兩可抵王僧慧已據實詳明布政
司批允臣查布政司詳文止有批查字樣而成元
捏稱已經批允所控已誣成元又供稱僧慧違例
預徵新泰縣六十六一兩年帶徵錢糧全完將
銀一千四百餘兩婉求成元收受成元隨後又退
還僧慧取有僧慧蒲臺縣印收為據查印收係硃

上蓋墨明係成元在蒲臺任內私留空白印紙後
填假收朱成元所供預徵全完又誣又供稱僧慧
威令經承李天錫等囑令里長李道恒等將民欠
捏報虧空出首圖賴銀兩等語均應刑訊因王僧
慧年老病篤不能受刑將僧慧管宅門家人孫榮
同經承李天錫等十餘人各加刑訊俱堅供係各
役情急出首竝無威令囑令等情又據經承李天
錫等供成元在蒲臺任內徵收錢糧令家人張成

桂在宅門經收糧戶錢糧哄騙鄉愚止給串票不

登流水簿又著里長李道恒等預繳錢糧五六十

兩不等交管門人張成桂收入只給總票許其存

算各花戶錢糧等語

臣

查朱成元在任年久地方

熟悉既侵用倉庫而又陷害衆民巧於彌補移新

蓋舊現在虧空共銀二萬六千餘兩朱成元自聞

調任新泰之信明知虧空甚多萬難交代遂與收

役張仲蘭等商議將成元項下侵蝕銀兩捏作民

欠暫掩交代俟到新泰設法抵項詎意到任甫及三月新泰又叅虧空張仲蘭等恐禍及已隨將捏造冊籍情由出首僧慧因有續揭三揭成元讐恨令家人張士榮叩

閤希圖將虧空錢糧推卸與收書里民及接任之員而冊籍有憑活口現在一堂之上吏書里民衆口齊證隨將張成桂刑訊各款直認不諱其成元在任將正項錢糧官侵吏蝕視庫項如已物現今刑

訊張宏圖王存義等十一人各名下共計侵蝕銀二千六百餘兩其餘實係朱成元侵蝕供明在案

臣奉

旨速行前往詳審具奏不敢稽遲先將審過緣由繕摺具

奏其虧空一案冊籍繁多現在行查謹

奏明恭候

諭旨臣臨奏不勝悚惕待

命之至謹

奏

朕總欲凡事得其實情將冊籍查明後具疏親帶來京
進奏可也據奏朱成元誣控顯然如此則可惡極矣亟
當從重定擬將伊任所資產行令地方官詳查毋令隱
匿並將其緊要用人嚴行看守防有兔脫特諭

內閣學士

臣繆沅謹

奏
臣於七月初七日接戶部知會奉

旨命臣同鹽臣鄭禪寶會查東省鹽政積弊臣遵

旨詳審朱成元案件不得親齎來京謹繕疏具

題恭請

聖旨其家產人口臣委員協同地方官詳查嗣據各州

縣造冊申送共估時值價銀二千八百餘兩其緊

要用人張成桂等現在收禁男婦八十六口分別

看守隨將各冊籍移交署撫臣岳濬收貯其歷城

縣申送查出朱成元任內送銀禮簿有字賬三十

本無字賬一本散賬二十八頁通計送銀禮賬二

百七十三頁

臣另繕疏具

題誠恐冒昧理合

奏明謹

奏

審理朱成元一案公明詳細殊屬妥協之至甚為可嘉
今清查鹽弊一事尤為緊要亦應如是秉公破面辦理
勉為之

內閣學士

臣

繆沅御史

臣

鄭禪寶謹

奏

臣

等欽奉

諭旨清查山東鹽弊其重複影射阿城改包種種弊端
併積年侵蝕正課數目臣等查出業於八月內具
奏在案其引張短少之處訊據本商劉袞劉養才連
名公具保結內稱如有隱匿積引日後或被查出
或經首告商人等情甘重罪等語臣等不敢因有
衆商甘結不復察訪隨又細加密訪今訪得運司

殘引房書辦康福盛等向有偷匿殘引情弊現今

寄頓戶總科堂號房內臣等同運使梅廷對親往

搜查果於堂西號房內搜出雍正五年殘引一箱

隨將康福盛等鎖拏收禁又至康福盛等家內搜

出康熙七年至六十一年雍正元二三四等年共

殘引四萬四千五百五十七道又運使梅廷對在

書辦盧鼎爵家碾盤下搜出歷年殘引一萬五千

一百六十道呈送前來其引目細數另繕清摺恭

呈

御覽_臣等逐加嚴訊康福盛等僉供歷年姦商書吏通同藏匿殘引營私作弊是實_臣等誠恐尚有搜查未盡隨經出示曉諭諸商及書吏人等令其自行出首_臣等現今搜出殘引之內除雍正五年殘引一萬七千五百六十九引交明鹽運使貯庫入五年奏銷冊籍外其雍正四年以前殘引容_臣等細加研訊取具確供按律定擬仰副

皇上肅清鹽政至意伏乞

聖鑒謹

奏

覽

如此搜查嚴急此外再有藏匿者必至於燒毀滅跡然亦不得不如此也

內閣學士

臣

繆沅御史

臣

鄭禪寶謹

奏為奏明事竊查馬禮善案內以財行求之顧九皋

金恒基李生馥三人原擬杖徒今訪得並非正身
乃係辦商錢連城范錄陸維宸冒名充徒前經 臣

鄭禪寶具摺

奏明奉

硃批諭旨可惡之極萬不可令免脫嚴審定擬具奏欽
此欽遵隨經刑訊錢連城等據供小的們是商人
顧九皋等夥計本商向來不在山東俱係夥計們
頂名行鹽辦課去年以財行求原是小的們做的

事後來塞巡撫批發張布政司楊按察司梅運司
會審時小的們曾供稱過本名顧九皋的夥計錢
連城金恒基的夥計范錄李生馥的夥計陳瑗承
審官員亦不曾究問等語訊據合綱商人等全供
行鹽引名顧九皋本商顧憲臣引名金恒基本商
劉袞引名李生馥本商李芳州各商本身俱在原
籍去年頂替充徒原是錢連城范錄陳瑗冒名去
的因陸惟宸陳瑗俱是李生馥的夥計以財行求

是陳瑗值月做的事不是陸惟宸做的及至充徒亦係陳瑗冒名頂替是實審據顧憲臣劉袞李芳州仝供錢連城等以財行求冒名充徒之處商人遠在各省居住實係不知辦課夥計有干法紀商人等情甘同罪有何辯處等語取供在案臣等現將錢連城等交歷城縣收禁外容臣等按律從重定擬繕疏具

題具承審失察各官塞榜額等一并

奏明聽候部議伏乞

皇上睿鑒施行謹

奏

具題到日有旨

再所奏清查追補一摺已交部議矣

侍郎臣繆沅御史臣鄭禪寶謹

奏為奏明事竊據解任運使梅廷對詳稱自雍正元年裁減鹽規後尚有耗羨銀二萬七千兩此內除

應解河工銅餉并運司養廉等項銀兩外尚餘銀
四千兩查山東各道員養廉俱止六千兩惟運司
養廉一萬兩似屬浮多應裁減銀四千兩每年應
節省銀八千兩自雍正五年三月蒞任及今年半
共節省銀一萬二千兩自應歸入公帑現將此銀
封貯道庫聽候解交等語又據山東鹽運分司宗
懷金詳稱雍正元年一切陋規盡行裁革應解銅
餉銀兩及卑職養廉每年議留銀九千六百五十

兩除公私費用外自雍正二年二月到任及今共
餘銀一千九百七十一兩情願歸公等語據此臣
等查運使梅廷對贓跡累累未便因其一詳遂寬
其咎現在繕疏

題叅再查分司宋懷金除引商應交養廉外又多收
票商銀兩容臣等查明繕疏彙

題外所有梅廷對宋懷金舉首出羨餘銀共一萬三
千九百七十一兩理合

奏明解赴內務府廣儲司交納伏乞

聖鑒施行謹

奏

此項銀兩不必解內務府仍應咨請部示遵行

侍郎

臣

繆沅

御史

臣

鄭禪

寶

謹

奏為請

旨事竊新任運使唐綏祖已於九月二十日到任凡鹽務一切積弊正需清理目今私販漸少額引不敷

自應增引增票現在檄行唐綏祖傳集引票衆商
公司妥議事關全省鹽政頭緒繁多必得運司專
心辦理庶為妥協唐綏祖現署山東按察司印務
關係通省刑名事務殷繁勢難兼顧理合據實上
奏伏乞

皇上敕下督撫臣將按察司印務另委賢員署理則鹽
務刑名均有裨益抑臣更有請者山東鹽務自奉
旨清查之後私鹽斂跡官鹽不足民食臣等現在斟酌

增引增票因事關通省州縣不敢草率遽定誠恐
民虞淡食仰祈

皇上天恩敕部將東省雍正七年額引預發十萬道來
東令運司速催各商及時告運接濟民食俟臣等
議定酌增引票數目鹽臣按依年分赴部請領引
票時除去現在預給數目一轉移間商民均沾
皇恩於無既矣理合繕摺請

旨謹

奏

所奏是已諭部議行矣

殊批諭旨卷一百四十六

欽定四庫全書薈要卷八千八十八

史部

硃批諭旨卷一百四十七

硃批蔡嵩奏摺

提督雲南學政臣蔡嵩謹

奏竊臣愚鈍庸才荷蒙

皇上天恩拔置

內廷擢受今職

恩榮稠疊感激涕零跪辭之日親承

皇上訓諭諄諄臣敬聆之下銘心鏤骨必期殫竭犬馬
以仰答

聖謨之萬一莅任以來目擊滇中之風俗醇美民物恬
熙而省會諸臣工皆和衷體

國實心辦事仰見我

皇上盛德明威無遠勿届而

知人善任能使羣工咸感動奮興各思宣力効能以
展布尺寸於

聖世也臣蒙

覽

奏

深

愜

朕

懷

同

寅

和

衷

以

扶

特

風

俗

人

心

乃

第

一

好

殊

恩

拔

擢

共

事

一

方

必

思

有

益

於

士

習

文

風

庶

幾

不

愧

事

互

臣職訪知

雲

省

人

文

以

臨

安

為

最

因

先

往

考

校

遍

閱試卷解題動多舛錯文字類皆淺率詢之教官

及守令俱云邊方未有師傅士子一入學便已滿

邊地

願即鄉會兩試皆就地取才竊謂如是亦足掇取

科名

更

不

復

思

精

進

臣

身

為

學

臣

豈

可

任

其

荒

棄

臣記幼年服習舉業看四書則以大全語類語錄

為宗看時文則以前輩歸有光黃洪憲黃淳耀等
為宗每日挨次看四書一二節即看此一二節書
中文字以印證書義如是兩年覺四書中凡一句
一字皆有著落行文亦自有意理今即以此刊一

是極

條約人給一通復責成各學教官督諸生每月計
報課程此舉最善臣於考試時即就經報看過四書中出題

以驗其所報之虛實又滇俗生計艱難士子念切
身家未免不顧名行臣於條約中已極言義利之

防復令各教官確訪諸生中有務本砥行者即親造其廬奉宣

皇上敦崇實行

諭旨更加勉誨俟有實蹟著聞另行

題請臣於考校時亦就文另提一等以示崇獎其誤

入匪類者先令教官親往委曲開導使之痛自改

遇有怙終不悛者必重加戒飭賞罰勤懲不可稍偏並

悔至半年後再令郡縣守令查從前訓飭諸生果

用之方於事有濟

否改悔另行勸懲臣於雍正元年五月內親奉

訓旨特重人心風俗復於十二月三十日敬接

聖諭首及實行文風臣日夜縈心殫竭愚昧欲以此二

者隨時策勵扶進人文上報

好極

聖天子慎選學臣易俗移風至意茲因天南萬里不得
若能以心相照雖萬里猶如目前何隔閡之有勉之
躬侍

龍顏又不能特遣家人恭請

聖安敬用繕摺附督臣上陳仰希

睿鑒謹

奏

所奏知道了如此方不忝督學之職也

提督雲南學政臣蔡嵩謹

奏臣於本年閏四月二十六日在曲靖考棚捧接

皇上硃批奏摺即設香案叩頭恭啓伏見我

皇上御筆輝煌凡關係緊要處俱分別

批示萬里之外洞悉情形臣一一謹誌伏讀

聖諭有云賞罰勸懲不可偏用真古帝王致治經邦之

大法臣仰體

諭旨凡有舉動必敬念遵依因思文章之事已經嚴限
課程逐時記報而士行尤宜慎重日夜躊躇特設
紀行循環簿發各府州縣官及各學教官公同稽
察諸生中有讀書自好及廢學驚外者逐一據實
填報臣乃得盡知諸生之行事隨其事之大小分
別勸懲臣自省至臨安至澉江至曲靖沿途控告
秀才者紛紛自此簿行後至今三月有餘往來考

校處所呈詞漸已稀少臣以為事屬偶然未敢遽
信目下方往西路考校再看沿途光景體訪情實
容臣據實詳

奏茲附督臣處恭繳

批摺并陳明近蹟仰懇

皇上睿裁訓示俾臣敬奉遵行謹

奏

好此教誡士子之良法也但須將教官選擇而用方有

實濟否則百弊隨生仍屬無益再汝前奏以黃淳耀為
時文之宗朕一時忽畧看過此論當更加斟酌朕意殊
以為不然

提督雲南學政臣蔡嵩謹

奏臣於雍正二年十二月十八日在永昌府考棚捧
接

皇上硃批奏摺跪讀

聖諭仰見我

皇上聖慮周詳洞見始末臣敢不倍加警惕凡各學教官之曠職不謹者已於計典中填報其現在供職者臣更加申飭教誡倘於諸生之優劣紀報不實甚至賄囑徇情臣即另疏參劾不敢容隱又臣前摺中陳明教士子看文之法有黃淳耀在內臣學識短淺昧於簡擇蒙

皇上睿裁示戒仰見

聖學高深真無一不兼總條貫臣思前輩時文向稱王

唐歸胡今以唐順之易之

好

此二臣

文名固不待言但古人已往後人尚有偏私之

本朝如熊伯龍韓茨等為時文模楷亦擬添入恭求

論何況

本朝人物耶汝自為猶可朕不便批定

聖鑒欽定俾臣得凜遵廣勵臣自雍正二年九月中往

迤西考校至今三月初六日考畢回省見迤西士

風頗覺樸實第義利之辨未明則人心風俗之本

不立臣惟於講解文義之外另加提命嚴行創懲

深為嘉悅

勉之

庶幾漸次改易以副我

皇上憂勤致治之意所有奉到

御批理合恭繳謹

奏

覽

硃批諭旨卷一百四十七

欽定四庫全書薈要卷八千八十九

史部

硃批諭旨卷一百四十八

硃批黃之雋奏摺

雍正三年八月十八日提督福建學政左春坊左

中允臣黃之雋謹

奏為欽奉

上諭事臣准督臣覺羅滿保撫臣黃國材移准吏部咨
奉

上諭凡文武官員曾經面奉諭旨除不能記載外俱將
訓旨一一詳細將年月日一同繕寫進呈等因通行
到臣臣蒙

皇上特恩命臣提督福建學政於雍正元年十一月初
二日恭請

聖訓蒙

召見養心殿

聖諭云汝學問好此去盡心辦事做官好朕知之不好

朕亦知之臣隨叩謝蒙

皇上重恩不次超擢

臣惟竭盡臣職不敢纖毫苟且

聖諭云非但不苟且凡地方上有所見聞可寫摺子奏
來所奏之語切不要使人知務必謹密但不可因此
挾制他人凡奏事摺可令家人齎進請安摺附督撫
皆可福建路甚遠此去又有三年欽此臣字字銘心
叩首而出自到任至今歲試八府一州已竣臣見
閩省文武大吏皆由

皇上簡擇任用其人品行事皆在

宸衷洞鑒之內至於府縣各官臣就按試時所見邵武

府知府曹友夏清勤愛民漳州府知府耿國祚才

優辦事臣試汀州時署汀州府事同知李暉勤慎

有守試建寧時知府辦銅公出署建寧府事同知

任煥亦有才幹又如莆田知縣朱子瓏南靖知縣

彭璋長汀知縣趙煌俱謹慎晉江知縣葉祖烈勤

敏福安知縣傅植明亮至臣所經過縣分一宿而

去未能深悉就臣所見如此今奉

上諭謹將前所請

訓旨繕寫恭呈

御覽因奉

訓旨內令臣言所聞見謹連接繕寫固封遣家人齎進

伏乞

睿鑒謹

奏

知道了將前面諭之旨另具摺單開寫進呈

同日又

奏臣材質庸駑荷蒙

皇上簡任督學閩省

陛辭之日跪頌

聖訓鏤心銘腑到任後復蒙

皇上拔置坊僚兩邀

寵擢感激無地伏念臣下之仰承

皇上如天之覆幬

皇上之知人善任如天之照臨無微不矚無遠弗届臣

今歲試已周謹將臣所已行者據實敷陳以仰求

訓誨臣自奉

命以來日念督學一職首在端學術以正人心而厚風

俗次及衡文以闡明聖賢之道臣見閩地負山襟

海形勢壯固土俗皆能治生兵民皆知畏法良由

聖德所暨者遠

聖化所洽者深是故文武協和兵民相安山陬僻壤素
稱刁悍之俗者亦皆率循至通省士子雖多向善
守法而其間越禮犯科者亦所在而有臣仰體

皇上教戒至意反覆開導刊布禁約累數千言頒行府
州縣學示以義利禍福已禁而仍犯者即行褫革
悔過而自新者亦量予開復又於學宮行香講書
之時和氣正色令諸生旅進環立喻以

皇上崇儒育材廣取士之額舉孝廉之行嚴加等之法

有善必獎有惡必懲欠糧包訟萬萬不可又恐言
語未必盡通令教官以土音遍告之繼蒙

欽頒

聖諭

廣訓

御製朋黨論即選工敬刊分行各學令生童朝夕肄業
務使身體而力行之又閩為宋儒理學之邦臣留
心採訪索其著述見諸生中有好學深思之士能

發明理道之奧者意其行誼必有可取容臣核實而獎薦之庶理學一途人知所勸至於衡文以制義為憑臣謂不讀五經則根柢不深不參宋儒則理解不的不讀古文則筆力不高不法先輩則家數不合而又非為人深潛純粹有所實得則亦不能暢然而成章臣刊發條約以此立教校試臣蒙恩視學有造士之職苟非殫精竭誠何以上報

聖主下酬夙志是以校試所至凡屬生童視如弟子法

嚴心慈手勤語複受任至今髮白眼昏而忘其勞

萍冀仰答

聖恩於萬一今將科試各府畧陳愚悃恭懇

聖慈再加

訓示俾臣益有所遵守以勉所未能不致有負

皇上重選使臣之至意臣謹

奏

百凡宜務實行不在文字語言間也至於頌聖諛詞朕

尤厭觀今此奏甚覺浮泛不切類斯等奏章嗣後竟可
不必朕實無暇披閱也



硃批諭旨卷一百四十八



總校官庶吉士臣侍朝

校對官編修臣馬啟泰

謄錄監生臣鄧椿

謄錄監生臣吳向仁